

Sing vooraf staande: Psalm 119:53 (p. 597)

53 Tot U roep ek; HEER, verhoor my, / en verlos my, maak my trou,
dat ek u getuienisse / heel my lewe lank kan hou.
Op u woord steun my verwagting: / smôrens by die eerste lig
is my oë en my hande / en my stem tot U gerig.

Ons hulp is in die Naam van die Here wat die hemel en die aarde geskape het.

Geliefdes, genade en vrede vir u van God ons Vader en die Here Jesus Christus deur die kragtige werking van God die Heilige Gees.

Amen.

Lofpsalm 146:1 (p. 700)

1 Prys die HEER met blye galme, / o my siel, daar 's ryke stof!
'k Sal, solank ek leef, my psalme / vrolik toewy aan sy lof
en Hom, wat sy guns my bied, / altyd groot maak in my lied.

Geloofsbelydenis: Apostolicum

Wet

Psalm 40:4 (p. 205)

4 Net om u wil te doen soos in u Boek / die wonderskrif wat nooit vergaan –
dit klaar van my geteken staan, / dit wil ek, HEER, van ganser harte soek.
Ek bied U hart en hande / in will'ge offerande – / al wat ek is en het;
diep in my ingewand / waar liefde en ywer brand, / draag ek u heil'ge wet.

Gebed

Amen.

Psalm 104:1, 21 (p. 510)

1 Waak op, my siel, en loof die HEER! / My God, U is uitnemend seer
verhewe in u majesteit, / U is bekleed met heerlikheid:

21 Al wie die HEER se lof mishag, / laat hul soos stof voor wind vervaag!
My siel, wat uitsing tot Gods eer – / sing onvermoeid, en loof die HEER!

Skriflesing: 2 Korintiërs 13

Teks: 2 Korintiërs 13:13

**Die genade van die Here Jesus Christus en die liefde van God en die
gemeenskap van die Heilige Gees sy met julle almal.
(2 Korintiërs 13:13-15)**

Elke keer wanneer ons in 'n formele vergadering met God – dis 'n erediens – saamkom, seën Hy ons aan die begin en aan die einde van die samekoms met die seën van sy Drie-enige teenwoordigheid in ons lewens.

Toe ons gedoop is, het God al hierdie seën van die Drie-enige God aan elkeen van ons gegee:

- Ons behoort aan die Drie-enige herskeppende God.
- Hy is die alleensaligmakende God wat ons onder alle omstandighede vertrou met wat ons ook al nodig het.

Watter mens lewe daar wat nie hierdie seën van die Drie-enige God nodig het nie? Ons het baie keer onder verskillende omstandighede die seën van die Drie-enige God nodig om ons te versterk:

- Soms staan ons by 'n graf waar ons iemand baie naby aan ons aan die aarde toevertrou in die geloof dat hy/sy weer gaan opstaan.
- Ander kere is daar hartseer oor ons eie sondes.
- Ander kere is daar angs oor ernstige siekte.
- Baie kere voel ons op die een of die ander manier bedreig.

Dit is net die seën van die Drie-enige God wat so groot is dat dit vir al hierdie dinge verligting gee.

Ons deel hierdie preek in drie dele. Ons gaan in elkeen van die verskillende dele kyk na die manier hoe elke een van die drie Persone van ons Drie-enige God ons tydens ons lewe en in ons dood versterk en troos:

- 1. Die Seun het ons verlos.**
- 2. Die Vader het ons uitverkies en bewaar ons.**
- 3. Die Heilige Gees maak ons heilig.**

1. Die Seun het ons verlos.

Elke mens wat eerlik met homself en met die Here is, weet dat hy uit homself en uit sy natuur baie makliker by die duiwel aansluiting kry as by die Here. Tog verstoot die Here ons nie.

- Daar staan geskryf dat God sy eie Seun vir ons in die dood oorgegee het sodat ons deur hierdie daad al God se genade kan kry (Romeine 8:32; Johannes 3:16).

Noudat die Here se toorn oor al ons sondes gestraf is, is die verhouding heeltemal anders tussen ons en Hom.

- Na die sondeval was ons doodgewoon sondaars wat die beeld van God in ons geskend het, en wat ons aan die sondes oorgegee het.
- Nou is daar as gevolg van die versoening deur die bloed van Jesus Christus so 'n teer verhouding tussen God en ons dat Hy ons sy kinders noem.
- *Natuurlik is ons nie bloedkinders van die Here soos wat ons die spesifieke verwantskap tussen ons onderling op die aarde ken nie. Maar dit is tog waar dat ons die Here se eiendom is – sy werklike eiendom in tyd en ewigheid.*
- Wat is die inhoud daarvan dat ons kinders van God is?
 - Die Here Jesus Christus het ons liggame en ons siele van die doderyk en van die mag van die satan af verlos en vrygemaak.
 - Terselfdertyd beteken dit dat Hy ons met God die Vader versoen het.

Die Here Jesus het nog meer met ons gedoen as om ons net kinders van God te maak.

- Jesus het ons van die satan verlos en Hy het ons ook van onself verlos.
- Hy het ons verlos van dinge soos ons willoosheid teen die sonde en ons skuldgevoelens wanneer ons sonde gedoen het.
- Die Here Jesus het ons ook vrygemaak van die geweld van die sonde (want alle sondes het in sigself die geweld van die hel) en die daarmee gepaardgaande oorheersing deur die duiwel.
- Ons is verder ook vrygespreek van die skuld waarmee ons as gevolg van al hierdie dinge voor God staan.

Hierdie verlossing deur die Here Jesus is nie gedeeltelik asof ons ook iets moet bydra nie.

- Dit is ook nie voorwaardelik nie.
- Hy het dit uit vrye wil gedoen in die volle sterkte van sy almag. Psalm 116:2 (berym):
*Om my was bande en strikke van die dood;
en angste van die hel het my laat bewe;
ek was benoud, vol droefheid was my lewe;
maar 'k het die HEER gesmeek in al my nood:*

Solank as wat ons in hierdie bedeling lewe, sal hierdie verlossing deur ons Here Jesus ons nodigste troos en hoop bly, want ons is nog nie in die volmaaktheid nie.

- In hierdie lewe is daar baie bande wat ons aan pyn wil vasmaak, soos byvoorbeeld verleiding in die sonde in.
- Of smarte wanneer die mense wat die naaste aan ons is doodgaan.
- Baie keer ervaar ons diep teleurstelling in ander mense wanneer ons verontreg word.

As dit al was wat ons kon oorkom, sou ons dit dalk nog kon hanteer, maar die probleem kom daarby dat al hoe sterker mens se geloof word, al hoe meer giftige vyande kry jy.

- *Hulle tart jou met dinge soos byvoorbeeld dwaalleer, of hulle benadeel jou vooruitgang en promosie by jou werk.*
- *Daarom is dit uiters nodig dat elke gelowige daagliks sal besef dat hy/sy in ons Here Jesus se beskerming 'n toekoms het wat heeltemal bo hierdie aardse geploeter uitstyg tot in die volmaakte heerlijkheid van God in.*

2. Om die seën van die Drie-enige God nog meer volledig te maak, gee ons aandag aan nog 'n saak wat hiermee saamgaan, naamlik: **Die Vader het ons uitverkies en bewaar ons.**

Die seën van die Here in die Ou Testament is baie sprekend van wat die seën van God vir mense beteken.

- Uit Genesis 12:2 is dit duidelik dat die betekenis wat jou lewe het, gekoppel is aan die seën van die Here.
 - Die Here het vir Abraham gesê:
Ek sal jou seën en jou 'n man van groot betekenis maak, en jy moet tot 'n seën wees. (Genesis 12:2 AFR53)
- Uit Genesis 49:25 is dit duidelik dat die seën van die Almagtige God dinge soos reën uit die hemel oor ons laat uitsak.
 - Selfs die fonteinwater en boorgatwater wat diep onder die grond uit kom is deel van sy seën.
- Deuteronomium 28:8 voeg ons graanskure en alles wat ons aanpak by.
- Waaraan ons baie keer nie dink nie is dat die seën van die Here ook betrekking het op die land wat Hy aan ons gee. (Vgl. ook Jeremia 31:23.)

Die hele verlossing wat ons in die Here Jesus Christus het, is inderwaarheid bewaring deur die Vader ook.

- Ons lees in Efesiërs 1:4 dat die Here ons voor die skepping al uitverkies het en dat Hy toe al besluit het dat ons in Jesus Christus heilig gemaak sal word sodat ons vlekkeloos voor Hom kan verskyn op die oordeelsdag.
- Die Here Jesus self sê ook dat Hy en die Vader een is, en dat wie Hom gesien het, die Vader ook gesien het.

Daarom is dit so logies dat die Vader se bewaring oor ons in Jesus Christus se versoening vasgemaak sal wees. Ons dink byvoorbeeld aan Jesus se gebed toe Hy gebid het dat van die wat die Vader Hom gegee het, nie een verlore gegaan het nie (Johannes 17).

God die Vader was van die vroegste jare af al daaroor besorgd dat ons moet weet dat sy seën elke sekonde van ons bestaan oor ons bevestig is.

- Dink maar net daaraan dat Hy beveel het dat sy seën elke keer amptelik oor sy volk bevestig moes word met die woorde:

Die HERE sal jou seën en jou behoed; die HERE sal sy aangesig oor jou laat skyn en jou genadig wees; die HERE sal sy aangesig oor jou verhef en aan jou vrede gee. (Numeri 6:24-26 AFR53)

Die Here het gesê dat sy Naam oor sy uitverkore volk gaan lê wanneer hierdie seën oor hulle uitgespreek word. Ons is dus vir die Here nie net gewone skepsele nie.

- Ons is vir Hom so kosbaar dat Hy sy raadsplan so opgestel het dat sy Seun 'n vervloekte dood moes sterf om ons te red.
- Die effek daarvan is dat ons elke dag kan reken op die Here se bewaring.
- As ons swaarmoedig word oor enige iets wat verkeerd loop of nie na wense gaan nie, kan ons maar weet dat die Here en sy beskerming nog steeds oor ons is.

Dit is juis waarom ons gelowiges weet dat daar nie iets soos toeval is dat dinge maar gebeur en per ongeluk saamloop nie.

- Elke sekonde van my lewe is sorgvuldig deur my hemelse Vader bepaal – so deeglik dat daar nie eers een haar van my kop kan afval sonder dat die Vader daarvoor besluit het nie.
- Ons is dus verseker daarvan dat ons nie aan die noodlot oorgegee is nie – ons bestaan binne die grense van God se raadsbeplanning.

Dit is nogal nodig dat ons dit moet weet, want nie een van ons is net sterk nie.

- Ons is almal uitgelewer aan inherente swakhede op bepaalde punte.
- Almal van ons kan in ons geloof verval as ons nie bewaar bly nie.
- Nie een van ons se insigte is so skerp dat ons nêrens 'n fout maak nie.

3. Die Vader bewaar ons uiteraard fisies sodat ons liggaamlik en materieel gesond en heel kan wees, maar Hy bewaar ons natuurlik ook geestelik. Daarom kyk ons ten slotte na die volgende: **Die Heilige Gees maak ons heilig.**

Die Heilige Gees werk in die onsigbare wêreld. Hy werk in ons hart.

- Hy werk met dinge soos ons gewete en ons verstand en ons insig.
- Hy laat ons verstaan wat die Here wil hê en wat nie.
- Hy lei ons om met wysheid op te tree.

Wat het dit met die seën van die Drie-enige God te doen?

- Die seën van die Drie-enige God is dat die Heilige Gees ons lewe heilig maak.
- Hy lei ons nie net om regverdiger te lewe en minder verkeerde dinge te doen nie, Hy lei ons ook so dat ons innerlik van die sonde afskei.
- Hy lei ons om wedergebore te word en om daagliks 'n lewe van wedergeboorte te lewe.
- Kom ek sê dit 'n bietjie anders: Hy verander ons hart en ons gewete só dat ons handewerk ook meer bekwaam is om die koninkryk van God te bou.

Wat gebeur met 'n mens wat elke dag lewe met die vaste besef van hierdie troos dat die Drie-enige God hom beskerm en bewaar?

- So 'n mens raak rustig.
- Sy lewe bring ook ook geloofsvrugte voort, want hy lewe met sy hart en verstand verlig deur die Here self.

Kom ek stel dit nog anders: Die Heilige Gees vestig die raadsplan van die Vader en die versoening deur Jesus Christus in die mense vir wie dit bedoel is. Luister na die Here Jesus se eie woorde:

En Ek sal die Vader bid en Hy sal julle 'n ander Trooster gee om by julle te bly tot in ewigheid: ...

... maar die Trooster, die Heilige Gees, wat die Vader in My Naam sal stuur, Hy sal julle alles leer en julle herinner aan alles wat Ek vir julle gesê het ...

(Johannes 14:16, 26 AFR53)

- Deur sy getuënis, sy krag en sy inwoning in ons maak die Heilige Gees ons bereid en gewillig om aanhoudend teen die sonde te stry, en as ons geval het, laat Hy ons weer opstaan uit die kwaad.
- Hy maak ons gewillig om ons onbekwaamhede te beveg en vir die Here te lewe.
- Dit staan mos in Romeine 8:15 en 16 dat die Heilige Gees ons lei om te bid en om te weet dat ons God se kinders is. (Vgl. ook 1 Korintiërs 2:12.)

Die Heilige Gees lei ons so dat ons deur alle teëspoede, armoede, siekte, smaad, onreg of wat ook al oor ons mag kom, moed bly hou en God van harte bly liefhê en dien. Om God Drie-enig te dien, en om getroos te wees.

Amen.

Slotgebed

Slotpsalm 119:48 (p. 595)

48 Dis 'n lig wat klare kennis / aan eenvoudiges ontdek;
dis die asem van die lewe / wat ek diep na binne trek.
Wend U dan nie weg van my nie, / wees my gunstig na die reg
wat in u verbondsgeheim'nis / aan u volk is toegeseg.

Die genade van die Here Jesus Christus en die liefde van God en die gemeenskap van die Heilige Gees bly by u almal.

Amen.

Dr MJ du Plessis
Hulpdienspredikant
Gereformeerde Kerk Clanwilliam
Datum: 2 Februarie 2014